



Орган Лемковского Союза

Выходит в каждый четверг.

Редакция и администрация в Крыниці. — Адрес „Лемко“ Крыница.

Зміна правительства во Франции.

Дня 21. червня т. р. председатель рады министров Блюм разом с министрами зголосил у президента республики официальне уступленне цілого правительства.

Причинем того было незатверджене финансового плану через французский сенат. Против самого Блюма сенат не выступал и Блюм може ввойти яко министр до нового ка-

бинету, а навіт може быти его председателем; сенат старал ся обалити министра финансов и тоту ціль осягнул.

В политических французских кругах идут старания, шобы утворити якнайскорше новое правительство, а то с огляду на финансове и политичне положене Франции.

—000—

Повстанчи войска опановали Бильбао.

Дня 20. червня т. р. повстанчи войска вкročили до Бильбао, головного міста басков. Баскийскы войска выцофали ся на запад от терену містячого ся меже горами Сан Юлиан и Мос Кетс ет Фрезе. Ест то терен горно-промышленный. Горы не сут занадто высокы, але доступ до них ест барз трудный.

Перед выцофанем ся с Бильбао баскийскы войска выдали приказ цілому населению зложити всі гроши и вартостевы предметы в касах. Собраны гроши и скарбы выслано панцырными самоходами до Сантандер, нового місца пребывания баскийского правительства.

—000—

Німеччина домагат ся конфискаты испанских подводных лодок.

Німеччина зажадала конфискаты подводных лодок, якими распоряджат флота испанского правительства. Німеччина мотывуе свое жадање тым, же безпеченство кораблей, котры принимают участь в морской контролі на испанских водах, не може быти певне так долго, покаль подводны лодкы маот свободу руху.

Німеччина разом с Италиом прирекают,

же постарают ся о того, шобы и войска генерала Франко выrekli ся подводных лодок. Лодкы подводны обох сторон мали бы оставати на час веденя войны в одном из нейтральных портов под лучном контролем 4-ох держав.

Жаданю Німеччины и Италии спротивили ся катогорично Велика Британия и Франция.

—000—

Всяди „врагы народа“, троцкисты и шпьоны.

На отбытой конференции партийного комитета краю азовско-черноморского стверджено, же в значной части партийных организации находили ся на начальных становисках люды, котры сут „врагами народа“, троцкистами и шпьонами.

Элементы антисовітскы достали ся всяди: до фаховых союзов, комсомолов, промысла, рольництва, просвіты, пресы и т. д. С партии вышмарено много троцкистов, помимо того о-

стало их ище дуже и тых послідных здемасковано аж тепер.

Конференция ствердила, же троцкисты организовали убийства работников через допущане до катастроф и пожаров. Партийны организации не сполняли в большой части своих обовязков. Антисовітска акция была розвинена найсильнійше в Ростові.

Таки вісти подають газеты с одной конференции, а тых конференции ест много по роз-

маиных частях великой России и есяди стверджат ся того само. В каждом окрузі видит Сталин „врагов народа“, троцкистов и шпьонов, а здае ся, же он и его сторонники сут нима в першой мірі.

Если вірити всеому, што читат ся тепер о житю в России, то мусит ся прийти до переконання, же там ест так эле, же люды зачинают ся масово бунтовати. Они бунтуют ся, хоц знают, же где их за того тюрьма и смерть. Але волят того, лем бодай не жити в „большевицком раю“.

Небывала афера с царскими червонцами.

Ровенской полиции попала в руки сенсационна афера, котра має свой початок ище в р. 1930. На волыньском рынку купуе ся много річей за золоты 5 и 10 рублевы гроши. Грошей тых остало по войні много и місцеве населене має до тых грошей довіре.

Тото довіре выкористали аферысты, котры хемичном дорогом вытягали с монет часть золота и пак пуцали монеты в обіг. Хемично даст ся того так зроби, же монета зверха виглядат совсем як правдива и трудно ю познати от полновартостной.

Такым способом оден с аферыстов Дмитриевский выдобыл с монет 20 кг. золота и заробил на том 120 тысяч зл. За тоты гроши купил дві вилли в місцевости Новостав коло Ровна и парцелі в самом Ровні.

Афера Дмитриевского обнимат широки круги, бо он мал до услуги цілый штаб посредников и агентов. Дмитриевский и его помощники находят ся в вязниці.

ПОСУХА ПРИЧИНОМ НЕУРОЖАЯ И ПОЖАРОВ.

Продолжаюча ся в том році посуха стае ся причином не лем слабых урожаев, але также выкликуе она часты пожары. Со всіх сторон краю доносят о великих и меньших пожарах, яки нищат добыток селянина.

—000—

Пренумерата в краю:

30 грошей місячно,
80 „ квартално,
1.50 „ полрочно,
3 зл. рочно.

В Америкі: 1 дол. рочно.

В Чехословакии:
2 кор. місячно, 10 кор. полрочно,
20 кор. рочно.

Ціны оголошень:

Ціла сторона 120 зл., $\frac{1}{2}$ стороны 60 зл., $\frac{1}{4}$ стороны 35 зл., $\frac{1}{8}$ стор. 20 зл., $\frac{1}{16}$ стор. 10 зл.; оголошения малы за 1 мм. 20 гр., в тексті 30 гр., перед текстом 40 гр. При місячном и долшом оголошеню значна знижка.

Конто чекове Нр. 404.155.

С Фонда Национальной Культуры не могут Комуникат в справі війсковых вправ.

Дня 17. червня предметом обрад Сейма была поправка Сената до проекта статута „Фонда Национальной Культуры им. Маршала Осифа Пипсудского”.

Справа тота интересує нас прото, бо „Фонд Национальной Культуры” ставит своим головном задачом давати помоч всім культурным начинанням в Польщі, уділяти субсидии товариствам, ширячим тоту культуру и отдільным людям, котрым потребна ест помоч для розвита способностей и талантов.

Попередний тимчасовый статут той пожиточной инстытуции предвиджал оказане подобной помочи всім товариствам и людям в Польщі без взгляда на национальность.

В таком самом духу уложено новый статут. Сейм принял тот статут с замѣткою, што Фонд Национальной Культуры дає помоч всім национальностям, живущим в Польщі. Проект переслано до Сената. Сенат не затвердил проекта и поробил в нем зміны и поправки а найважнійша с них ест тот, же Фонд Национальной Культуры буде помагати лем польським товариствам и полякам.

В таком виді проект вернул зас до Сейму и сеймова комиссия отшмарилла поправку Сената и дала проект под голосоване Сейма.

Именем комиссии докладала депутатка В. Пелчинска, котра мотывовала становиско комиссии тым, же культура в Польщі повстала на основах гармонийного об'єдиненя польской культуры с культурами других народов, живущих в Польщі.

По ней выступил посол ген. Желиговский, который признал, же если ест бесѣда о славянских меньшинствах, то он поддерживает их культуру, але кромѣ славян живут в Польщі жида, котры маюť совсем иншу психологию и свою отрубну культуру, котрой Фонд Национальной Культуры не може помагати. В виду того, же с причин формальных Сейм не може вставити поправки „для всіх славянских народов” прото ген. Желиговский заявил, же буде голосовати за принятием поправок Сената.

В голосованю Сейм принял всі поправки Сената, а тым самым и тоту, же с Фонда Национальной Культуры не могут користати инши народы, живущи в Польщі.

Идут великыма громадами, а ест их всіх 800 тысяч. Идут пустыньом. Гдєкотры гинут от спеки, падають им бараны, але они идут дальше. Хотят ся задержати аж там, где найдут траву и зелень.

Мериндю с долями порвала ворона.

Смѣшний випадок мал місце в селі Розстайне ясельского повіта. Ёдна баба достала с Амерыкы 220 долларов и боячи ся, штобы не закрал ей дакто тых грошей, носила их все при собі.

Рады учителя и сусѣдов, штобы отдати гроши до касы и слухати не хотѣла. Аж дня 19. червня, идучи на роботу в поле, взяла с собою мериндю и до шматкы раз с мериндѣм завязала грѣши.

На поли положила она того вѣсьо под межу, а сама взяла ся до работы. Нагло надлетѣла ворона, опустила ся скоро на землю и хопила в котті мериндю с долями.

Баба в крик. Збѣжали ся сусѣды и всі женут за вороном, котра летит ку лісови. На счастье коло ліса змордована ворона выпустила мериндю и гроши. Чи не лучше складати гроши в певных касах на процент, як ховати их в меринді, або скринях?

СУПРУЖЕСТВО С ЛЬОТЕРЕИ.

В Дукштах в повіті вилейском сорганизовано серед жидовского населения незвычайну льотерею. От долшого часу не женит ся там никто, бо жидовкы сут бѣдны.

Оден молодой красныи жид урядил льотерею, в котрой можна выграти того жида. Льосы по 5 злотых, а ест их 2.000. Як продадут всі льосы, наступит льосоване. Жидовка, котра вытягне счастливыи льос, выйде за муж за того жида и достане придане 10.000 злотых.

НА РОГАХ ОШАЛІЛОЙ КОРОВЫ.

Ведена через дорогу в Семяновицах на Шлеску корова достала нагло атаку шалу и поранила тяжко трох прохожих. Ошалѣле звѣря застрѣлил переходячий полицянт.

Втічут перед солнцем.

Сонце уважає всі за добродѣйство и в нашом климаті ждеме его нетерпеливо. Але и то добродѣйство може стати ся часом несчастьем для людей. Так ест у нас в том році. Хоц всі тішат ся теплом и солнцем, с нетерпѣнієм ждуть они на дожджи, о котры в том року ест барз трудно. Але у нас не было в гдєкотрых закутинах краю дожджу два місяцы, а штож бесѣдовати о таких пространствах, где сонце пече безпрестанно уж два roky и люды ждуть даремно каплі дожджу. Таким краєм ест именно Мароко, французска колония, положена в Африці. Там на великом пространстві уж от двох літ не было ани каплі дожджу.

Высохли совсем чимраз тоньши струи потоков, в студнях нѣт ани каплі воды, а через воду величезных ставов прозерат намул дна. Не помогли просьбы до Бога, заводячи, ййчачи, молячи. Уж пришла трета рочница Пророка от часу, коли на небі появила ся послѣдняя хмарка.

Земля высохла на кость. Найперше змарніли зерна, пак оливны деревья перестали родити, а наконец пришла черга на пальмы. Аж и найвытревальши пальмы дактылевы, котры выносят барз добре засуху, скорчили ся и пожолкли, а листе с них опало. Засуха замѣнила цілы пространства в розпаленный пец, где гынули люды и звѣрята.

Коли начал ся третій рок без дождев, людѣ огорнул страх. Зазрѣл им в очи голод и ище страшнійша от голоду жажда. Рѣшили не ждати ратунку. Почали громадно утікати. Як найдальше на полноч! На встрѣчу дожджу.

Спаковали на верблюды цілый добыток, забрали овцы и пошли пред себе на полноч.

УМЕРЛА В БОЧЦІ С КАПУСТОМ.

В селі Рожанці коло Сколього пошла 40-літна Анна Ковалев до коморы на капусту. Бочка была высока и баба приставила собі до бочки лавочку, штобы с ней, нагнувши ся, достати капусту с бочки. В часі того баба перехылила ся занадто, упала до бочки на голову и задусила ся.

В текучом року будут покликаны на звычайны войсковы вправы тоты подофицеры и воякы, належачи до резервы, котры достанут именны карты покликания.

Покликаны на войсковы вправы могут с важных причин, як нпр. смерть и несчастье в родині, або с других важных причин одержати пересунене часу отбытя вправ на термин позднійший, як тот, котрый назначено им в карті покликания.

В таком случаю належит внести просьбу через Староство до той Повітовой Коменды Дополненъ, котра выполнила карту покликания и то найпозднійше на 4 тыждні перед термином роспочатя войсковых вправ. Близши информации сут оголошены в обвѣщенях, вывѣшенных в каждом селі.

Комуникат в справі отдолженя селян.

С Воеводского Бюра до Справ Финансово-Рольных доносят:

С днем 28. жолтня 1937 р. кончит ся час 3-ох літний, вызначеный до выкористаня гдєяких льгот, выплывающих с постановлень зарядження През. Р. П. с дня 24. X. 1934. р.

Для даня возможности всім селянам-должникам выкористаня льгот в сплаті долгов, продолжено тот термин законом с дня 14. квітня 1937. р. до дня 31. грудня 1940. р., а если иде о подаване внесень до „уряду розѣмчого” о обнижене долгу с тытулу поділов родинных и наслѣдственных (арт. 53. уст. 3. декрета), продолжено тот термин до дня 31. грудня 1938. р.

В термині до дня 31. грудня 1940. р. можна адекват:

1) сплачати рольны долги вартостевыма наперами (арт. 13. уст. 1. и арт. 16.);

2) конвертовати рольны долги на кредит долготерминный (арт. 18.);

3) сплачати через господарей группы А (котры маюť меньше, як 50 гектаров грунту) долги перед термином с тым, же каждая запла-та готовыма грошами, буде амортизовати 200% заплаченной суммы (арт. 43. уст. 1.).

В термині до дня 31. грудня 1938. р. можна складати внесень до „уряду розѣмчого” о обнижене долгу с тытулу поділов родинных и наслѣдственных (арт. 53. уст. 3.).

Важне ест также дополнене постановлень арт. 55. уст. 6. роспорядж. През. Р. П. с дня 24. X. 1934. р. в том напрямі, же если должник внес подане о обнижене рѣшты ціны купна за грунт, за котрый виплатил уж понад 30% умовленной ціны, продаючому не прислугує уж право зложити внесене о розвязане контракту продаж.

ПЕС ВЫРАТОВАЛ ДІТИНУ.

Незвычайный случай мал місце в тых днях на озері могиленском. Ото 5-літний хлопѣц впал нагло до глубокого озера и почал топити ся.

В том часі преходила коло озера одна міщанка с Могильна с псом-волком. Пес, видячи порынаючу дітину, скочил до воды и вытянул ю на берег.

Організуйте кооперативи селян-продуцентів.

Коли присмотриме ся ближче нашому господарчому життю, спостережимо, же розвиват ся оно неправильно. Кілько то раз н. пр. слышит ся, же урядники и міщане скажуть ся на того, же рольны продукты сут дороги, а одночасно хлопны скажуть ся на низкы ціны земледельцовой.

Ани одны ани другы не пересаджують. Скрупулянтны розсліди дійсительности доведуть до конклюденту, же насправду хлоп достає барз мало за проданы товари, а консумент платит за них дорого, а діє ся того прото, бо на товарах тых заробляють барз дуже посередники.

На основі обчислень Е. Івашкевича можна ствердити, як дорого коштує посередництво. За жито (по перемолотю платит консумент ціну, котра выносит 193% ціны господара-селянина, адже близько два раз вышше, як бере хлоп за жито. За пшеницу по перемолотю платит ся перешло два раз вышше ціну от той, яку бере хлоп. То само єст с мясом, котре выносит 217% ціны браной через хлопа за живый товар и при других рольных продуктах. (Свині — 198%, масло — 225%, молоко и яйця — 180%, рыбы — 1000%).

Але не помогут даремны жалі на кельтовный посередничий апарат. Єст то легко валити вину на посередников, але не пошкодит призадумати ся и над тым, чи и сам хлоп не поносит ответственности за такий стан річей.

И насправду видит ся, же вина хлопа єст тыж велика. Мусиме ту взяти под увагу ціле пространство державы, бо на ціну якогоси товару впливат подаж того товару в цілої державі. А тимчасом єст так, же в многих закутках Польщи продають селяне статок и свині

не на торгах, лем гандляры скупують их по селах.

Розуміє ся, же хлоп, котрый николи не ходит по торгах и не знає ціну, продає свой товар за полдармо и на том товарі — на мазольном труді хлопа богатит ся посередник. Таке явленє доказує, же хлоп сам за мало дбає о свои доходы, не интересує ся рыноковими цінами и дає ся все використати.

За границом єст иначе. Там селянин посуват ся якнайближе со своим товаром до консумента. Там часто организации продуцентів достарчують товар безпосередно организациям містовых консументов и таким способом поминяють совсем посередников. Того само дало бы ся перепровадити и у нас через закладанє кооперативов збыту земледельцовой.

У нас закладають ся кооперативы консумційны, в котрых селянин може достати потрібный ему товар. Але тоты кооперативы часто не розвивають ся належыто, бо селянин не маючи грошей, не може быти добрым отберателем товару. Треба конечно дати ему передом можность и силу купна, а тоту даст ся ему аж втотчас, коли хлоп за проданный через себе товар достане таку ціну, котра позволит ему покрити выдатки злучены с веденєм господарства и купити кромі того гдетько потрібны хлопцу товари.

Таки ціны могут дати нашому селянину лем кооперативы збыта земледельцовой и всіх товаров сельского хозяйства. Треба конечно перевести по селах организации продуцентів-селян, а втотчас не оден грош, на котром пасє ся тепер посередник — млынар, різник чи пекар — остане в кишнях хлопа.

Чи насправду в Польщі єст замало ґрунту.

Тепер, коли на селі єст шторааз больше безработных, заходит пытанє, чи земля в Польщі потрафит выкормити больше людей, як єст их тепер. Отыт на того пытанє можна дати, поровнуючи отношеня у нас с заграничными.

Пространство землі, обернене у нас для цілей рольных выносит в Польщі 25 миллионов 600 тысяч гектаров. Больше пространство має Россия (525 мил. га), Аргентина (175 мил. га), Злучены Державы Ам. Полночн. (149 мил. га), Франция (35 мил. 400 тыс. га), Німеччина (29 мил. 300 тыс. га), Канада (27 и пол мил. га), а уж в Италии єст меньше, бо 23 мил. 100 тыс. га, в Великой Британии 19 мил. 700 тыс. га) и в Австралии 14 мил. 400 тысяч гектаров.

На 100 люда припадає в Польщі 75 га землі для цілей рольных. Лем позаевропейскы краі розпоряджуют значно большими пространствами. Выносят они в Аргентині 1.480 га, в Злуч. Держ. Ам. Полн. 120 га, в России 317 га. С краєв европейских больше землі припадає в Дании и Франции (по 85 га на 100 люда), а также в Швеции (81 га). Иншы державы розпоряджуют уж меньшими пространствами землі и так: Италия 56 га, Швейцария 53 га, Німеччина 45 га, Велика Британия 42 га, Голландия 28 га, Бельгия 22 га.

Польша має кромі того до розпорядимости гдетько терены невыкористаны для цілей рольных. Не єст их так много, як в колонийных державах, або в России, бо Россия сама розпоряджует 1.972 миллионами гектаров, а иншы державы мають также тых теренов больше и так: Канада 928 мил. га, Австралия 756 мил. га, Злуч. Держ. Ам. Полн. 645 мил. га, Аргентина 104 мил. га. В Польщі єст таких тере-

нов 13 мил. 600 тысяч га, с котрых часть може быти використана для рольных цілей (по потрученю лісов и неужитков).

Если ходит о орны поля, то их пространство в Польщі ровнат ся приблизительно пространству в гдетьких великих краях Европы. Выносит оно 18 мил. га, коли во Франции 21 мил. га, в Німеччині 20 мил. 400 тыс. га, в Италии 12 мил. 900 тыс. га и в Великой Британии 5 мил. га.

Орного поля на 100 люда припадає в Канаді 226 га, в Аргентині 216 га, в Австралии 197 га, в Злуч. Держ. Ам. Полн. 108 га, в России 78 га, а в Польщі 56 га. В инших державах, кромі Швеции и Дании, где припадає на 100 люда 61 га, пропорция тота єст низша и так: во Франции на 100 люда припадає 50 га, в Бельгии — 15 га, в Голландии — 11 га, в Великой Британии — 11 га.

Кілько поля засіваме зерном в Польщі?

Зачнийме от пшеницы. Ту Польша стоить на уровні таких держав, як Німеччина, Югославия, Венгрия и Болгария. Засіват она пшеницом всього 1 миллион 600 тысяч гектаров. Перед Польшом иде Россия (32 мил. 600 тысяч га), Злуч. Держ. А. П. (24 мил. 300 тыс. га), Индии (13 мил. га), Канада (10 мил. 300 тыс. га) и Аргентина (7 мил. 400 тыс. га).

Лучше єст с житом. И ту перше місце занимає Россия (26 мил. га), але друге місце припадає Польщі (5 мил. 700 тыс. га), дальше иде

Німеччина (4 мил. 600 тыс. га), Злуч. Держ. А. П. (1 мил. 300 тыс. га), Чехославия (1 мил. 100 тыс. га), а иншы державы засівають житом ище значно меньше пространства.

Жита и пшеницы зберат Польша 82 миллионы 300 тысяч сотнаров и ту уступає Німеччині и Франции и єст на одном уровні с Италией.

Як представляєт ся того положенє в перечисленю на 1-го человека? Если ходит о пространство, то Польша єст в том напрямі в значно лучшем положеню от инших европейских краєв, бо має на 100 люда 22 га ґрунту, засіяного житом и пшеницом. (Франция — 14 га, Италия — 12 га, Німеччина 10 га). Хліба має Польша 250 сотнаров на 100 люда, коли Франция має 207 сотн., Німеччина 179 сотн., Италия 162 сотн.

Наконец посмотриме, кілько поля перезначає под картоплі. Польша занимає ту перше місце по России, котра засаджует картоплями 5 мил. 900 тыс. га, а Польша 2 мил. 800 тыс. га. По Польщі иде Германия (2 мил. 600 тыс. га), пак Франция (1 мил. 400 тыс. га), Злуч. Держ. А. П. (1 мил. 300 тыс. га). Урожай картофеля представляєт ся планше, бо Польша с 302 мил. 600 тыс. сотнаров, уступає значно России (469 мил. сотн.) и Німеччині (438 мил. сотн.). В перечисленю на 1 голову населения положенє в Польщі єст добре. Має она на 8 люда 907 сотнаров картофеля.

В перерахованю на 1 голову населения Польша має больше число ґрунтов орных и ґрунтов, засіяных житом и пшеницом от большинства держав европейских. Тож може в случаю поднесеня ся плодов выкормити лучше як тепер значно больше людей. Прещя пространство ґрунтов под пшеницом, житом и картоплями, тьма найважнішими земледельцовой, єст в Польщі больше, як в Німеччині, а людей в Німеччині єст два раз больше, як в Польщі. С того видно, же если бы дати рольництву в Польщі добры условия, може оно выкормити два раз больше людей.

До чого доводять маєтковы спори.

В суді в Рыбнику на Шлеску пришло до кривавой росправы меже Малержом и єго тестем Мрозиком на почві родинных маєтковых споров.

Мрозик продал своєму зятю господарство зложено с 40 моргов поля, и оставил собі лем невелику часть господарства.

Другы діти были с того недовольны и почали бунтовати отца против зятя. Доходило шторааз частійше до звад. Малержа оскаржено о подпаленє господарства и наконец тесть заскаржил єго о рещту ціны купна, бо Малержа заплатил до того часу лем половину за куплений ґрунт.

Пришли оба до суду, где мали оголосити вырок. В суді Малерж вынял скоро револьвер и застрілил тестя. Пак отдал револьвер судии и сказал: прошу мя арестовати, бом убил человека, котрый не давал мі жити. До того довели родинны маєтковы спори.

ОТКРЫТКА ПОЧТОВА ІЗДИЛА ПО СВІТІ 40 ЛІТ.

До Ярослава пришла почтова открытка, котру ище дня 9. марта 1897. р. выслал Новак с Ярослава до Флейшмана в Будапешті.

Открытка тота вандровала по світі 40 літ и аж 28. марта того року вернула до Ярослава, яко нероручена.

Що чути в світі.

Лічат ядом змий. „Совітський лікарський журнал“ подає, же віденський учений д-р. А. Мехнер досягнув добрих результати, куруючи людей ядом змий. Особливо скоро курує яд змий провлекли катары. Мазь с ядом змий втерат ся хворым два раз денно в руки, на переміну раз в одну, раз в другу руку. Уж по другом втераню наступат значне облегченє, а по 4—6 втеранях катар уступат аж у таких хворых, котры цілыма роками курували ся на катар и не могли ся его позбыти.

Дітина - великан. В місцевости Вйонзовня, в 20-ох кілометрах от Варшавы находят ся німецькы окопы с часов світової войны и в одном с таких окопов уж от 5-ох літ живе емигрант с Росии Петро Помилуйко с женом и 3-ма дітьми. Живє бідно, бо єст безробітним и лем от часу до часу хапат яку роботу при дорогах, або помагат газдам в полевых роботах. Живє в окопах, где в часі дожджей вода заливат дылины и стоить так долго, покаль не всякне до землі. Нераз приходить ся ему и голодовати. И напевно никто не знал бы о нем, если бы не то, же перед 10 тыжднями уродил ся сынок, котрый єст правдивым атлетом. Правда, отец также великан, але сынок — правдиве чудо. Он важить 9 кг. и єст барз сильно збудований. Мало того, он ходить уж, триманий за ручку отцом або матерю. Слава малюго великана дошла аж до Варшавы и варшавських газет. Отцу предлагано, шобы отдал сына на вихованє, але он, хоч бідный, не хоче и чути о том. Чи не добре было бы помочи отцу в вихованю дітины - великана?

Самоубийство Червякова. Предсідатель Центрального Исполнительного Комитета Социалистичной Совітской Республики Білорусии, Александер Червяков застрілился дня 16. т. м. Яко причину самоубийства газеты подают переживаня родинного и личного характера. Червяков грав видну ролю в совітском житю Білорусии.

Когут, засуджений на кару смерти. В некоторых краях ище дотепер судят не лем людей, але и звірята. Перед пару днями справа така мала місце перед судом в Ля Каридад в Гондурас.

Когута оскаржено о убийство хлопца Каналеса. Злочин наступил в слідующих обстоятельствах. В Гондурас отбывают ся бои когутов. Перед пароме днями бей такой отбыл ся в Ля Каридад и на рингу станули два сильны и росіярены когуты. При ногах мали они присилены долгы сталевы ножи, котрыма мали ся взаимно ранити. Неждано оден с тых когутов, подражненный криками зритель, вмiсто на своего противника, скочил на хлопца и перерізав му горло. Помимо лікарской помочи хлопец умер. Бой перервано, когута - убийцу отдано под суд и суд засудил его на кару смерти. Кат с трудом дал си раду с засудженным.

Спят миллиард долларов. В Америкі на каждом долларі был напис, же банк на жадаєне выплачат каждому за паперовы гроши золото. По выдрукованю грошей с тым написом в Америкі вышол закон, забороняющий посіданє золота через особы приватны. В виду того треба знищити всі банкноты, посідаючи тоты написы и в Нью-Йорку спят незадолго долларовы банкноты о вартости миллиарда долларов.

Вынашли зимне світло. От долгого часу учены старают ся вынайти такой способ освiтлення мешкань, котрый бы давал світло без тепла. Світло такое, если ходит о електрику, было бы значно яснійше и стало бы ся подобне до світла сонечного, притом было бы дешевле, бо до тепер много энергии иде на вытворенє тепла. В послідных часах досягнуто много добрых результатов. Двом німецьким хемикам Глею и Петшови удало ся вытворити світло хемично, котре єст цілковито зимне. Вынаход тот може принести переворот в освiтленю хат и вмiсто теперешных ламп, будеме мати ясне и дешевле зимне світло.

Вісти с краю.

Борба с фальшованием монопольных товаров. Финансовы власти приказали финансовым контрольным органам звернуть увагу на склепы, котры продают монопольные товары. Послідны ревизии выказали, же в гдєяких місцах продажи фальшуют водку и спирт, доливаяючи до фляшок воды. Робят также и так, же алкоголь слабший переливают до фляшок с этикетками сильнішого алкоголя. За такое фальшование грозит велика грошевая кара, а также тоты, котры фальшуют, отвічают перед судом карным.

Самоход спалил ся в часі їзды. На дорозі меже Фордоном и Быдгощом станул в полове ни самоход, запаленый от розрыва мотору. Шофер и їдучи самоходом люди спасли ся у течом с самохода. Самоход згоріл цілковито в продолженю нарунадесятих минут.

Сестра Тухачевского живє на Воляни. С Варшавы доносят, же в Луцку на Воляни живє тьочана сестра Тухачевского. Называют ся она Надежда Николаевна Гук и єст касиерком в веслярском клубі в Луцку. Там нашла ся она по большевицком перевороті и боролась долго с материальными недостатками, аж наконец заняла місце касиерки.

О Тухачевском говорит она, же был он третьим сыном богатого земского властителя Николая Николаевича Тухачевского, маючого в губернии смоленской и псковской великы маетки.

Родина его складалась с 7-ох братьев и 3-ох сестер, котры были старанно вхованы. Сам маршал зраждал в молодости велике замилуванє до музыки и предсказывано ему ве-

лику карьеру виртуоза. Он однак посвятил ся справам войсковым. Со слов его сестры выходит, же относилась она до него ворожо от момента, коли он вступил на службу большевицку.

Смерть в пыску собаки. В часі войсковых вправ в метаню гранатами в одном войсковом отділі под Седльцами, находячий ся недалеко пс побіг за вышмареным через вояка гранатом, взял го до пыска и почал го нести ку воякам. Воякы, здаючи собі справу с опасностью, отогнали пса, мечучи до него камнями. Таким способом задержали пса на парунадцет метров перед собом. В той хвилі гранат росорвал пса на куски. Воякам нич ся не стало.

ВАЖНЕ ДЛЯ ДЯКОВ.

Повiдомляю интересованных кандидатов на дяков, а также неиспытанных дяков, желающих здати испыт, што

дня 16. серпня 1937 открываю
3—4 МІСЯЧНЫЙ КУРС ДЯКОВСКИЙ.

По оконченю курсу кандидаты поддадут ся испытю в Мысцові перед Комисією делегированом через Апостольску Администрацію.

Платня за науку 15 злотых місячно. По близши информации звертати ся под адр.

МИХАИЛ ФЕЦИНА

пів. церк.

МЫСЦОВА — почта Жмигород.

В прекрасной горской курортной местности повіта горлицкого иде на продаж

НОВА ВИЛЛЯ

о 5-ох покоях с верандами и сутерынах.

В кухні водопроводы. Вилля умебльована. До виллі належит яринный огород и 2 моргы управленого и засіяного поля. Полный инвентар господарский живой и мертвый.

Близши информации у настоятеля
РУССКОЙ БУРСЫ В ГОРЛИЦАХ.

**КУПЛЮ ВЕЛИКУ ИЛЮСТРОВАНУ БИБЛИЮ
О. МАЩАКА.**

Адресовати до администрации „Лемка“
Крыница.

КТО ХОЧЕ ЗАБЕЗПЕЧИТИ СЕБЕ НА СТАРОСТЬ И РОДИНУ
ОТ НУЖДЫ И ГОЛОДА, АБО ЗЛОЖИТИ ДІТЯМ ВІНО.

НЕХАЙ ЯКНАЙСКОРШЕ

заасекурує ся
в аскураційном Товаристві
ВИТА И КРАКОВСКЕ
во ЛЬВОВІ

Аскурацію принимают на цілої Лемковщині
представителі: гг. Осиф Ямовицкий — Крыница - Село
и Михаил Перелом — Сянок.